

四庫全書

史部

欽定四庫全書

史部
金佺續編卷八

詳校官編修_臣范來宗

刑部郎中_臣許兆椿覆勘

總校官檢討_臣何思鈞

校對官中書_臣陸湘

謄錄監生_臣王宮

欽定四庫全書

金佺續編卷一

宋 岳珂 撰

易曰大君有命開國承家夫辨五等選羣辟建侯於
經綸草昧之初列爵於崇德報功之後固古先哲王
之所以公天下而非以為一家之私也庭堅之邁種
逮于蓼六周召之夾輔載于燕魯大勲開四履盛德
祀百世是國也非所謂世其家者歟國有春秋家有

譜牒紀事雖殊為用不廢夫其著鼎彝登旂常胙土
疇功此國之所繇開也昭明其湮蝕罔羅其放軼廣
記備錄思以盡為子若孫之心又豈非傳家克承者
之責耶先王佩佗綬于鄂珂不肖幸因今天子霈泰
時之澤獲以支邑紹分舊封亦既頒蒲瑞于朝執而
歎曰三趙命名此贊皇氏之所以不忘乎先也家故
有金佗編因先爵以叙遺烈嘉定戊寅嘗製之攜李
矣而辛巳之褒忠乙酉之錫諡異渥殊榮焜耀狎至

則未之續也行有述也而弗該乎絲綸見聞有取也
而莫並乎百氏宸奎之藏扣閤之已進嘗彙之於前
矣而按訪之嗣獲顧闕之於後天定之錄非劉之曠
典槩表乎其末矣而思陵之盛心反略乎厥初顧其
可已哉夫析圭儋爵上之恩也貶德流慶先王之澤
也知侈金佗之寵而不知乎櫛沐以致之之功知家
之承而不知國之所以開之之自斯責也珂將奚辭
即觚槩之末伎以文其肯堂析薪之未能何異乎持

泚泚統以自獻猶竊恕曰易之所以開國承家者或在於是斯又類乎聞鐘揣籥以求乎日者也凡書四種合三十卷命之曰續蓋以合檇李舊刻同為一編云嗚呼是續也焉知其不復續子孫之心聞斯傳之其又何時而可已耶紹定改元歲重九日珂謹序

高宗皇帝宸翰撫遺卷一

建炎四年

九月先臣自泰州奉詔援承楚初引兵屯三

闕

整遂抵承州轉戰踰月三戰皆大捷殺其大

將高太保擒女真渤海漢兒軍等又俘阿珠貝

勒及琳沁阿蘓嚕拜達勒富色呼將士七十餘

人送行在上嘉厥勲賜金酒器賜御札

合在本
年第一

詔之
次

勅岳飛節義忠勇無愧古人所至不擾民不知有兵也
所向必克冠始畏其威也朕甚嘉焉方今國步艱難非
卿等數輩朕孰與圖復中土者耶奈何江表尚多餘寇

卿可竭力措置擒獲必期靜盡無使越境為吾之憂姑
賜卿金注盃一副盞十隻聊以示永懷也

七日

御押

九月先臣始入通秦劉光世奉詔援承楚不肯
渡江遣裨將王德往以敵遁奏賜御札令先臣

協力勦撲

合在紹興四年
第一詔之上

近據劉光世差王德等統率軍馬過江之後累奏戰捷
殺獲金人甚多彼久駐江淮即漸抽退其未去者數雖

不多若不乘勢勦除終作腹心之患正諸將立功報國
之秋也岳飛奮命許國忠勞甚著朕常嘉之今可與光
世所遣將領等協力並進往承州楚州等處殺伐敵寇
期於勦撲當議不次推賞具有能獲龍虎太師者白身
與除觀察使

九月十五日付岳飛

紹興三年

春大寇陳顥彭友等連兵數十萬據虔吉州以

叛上詔江西安撫大使李回令擇本路盜數最熾諸將所不能制者顯以屬先臣於是始移軍於洪夏四月至虔州時民挺于亂饋餉阻難上憂先臣軍或至乏絕乃申詔計臣督辦屬以明

憲且賜御札令趣進兵

合在前詔之次仍在紹興四年第一詔之上

朕已親勅諸路漕臣應副卿軍馬錢糧坐貶嶺外之罪卿當體國疾速統率精銳人馬前去務要招捕靜盡無使滋蔓罪有所歸仍具起發日時及沿路所至去處逐

旋以聞

付岳飛

御押

先臣既破固石洞大敗賊兵擒顯等以入于虔
上疏乞誅首惡而赦脅從詔俞其請秋七月有
旨詣行在上猶慮羣寇遺類為患異日賜御札

趣覲仍寓聖訓

合又在前詔之次仍在
紹興四年第一詔之上

具奏省卿殄滅羣寇安靖一方應無遺類為異日之患
也朕甚嘉之已詔卿赴行在可即日就道勿憚暑行紀

律嚴明秋毫不犯卿之所能也朕不多及七月十二日

勅岳飛

御押

紹興五年

二月先臣還自廬州既破金齊之師遂入覲上

眷禮優渥申以錫賚貶恩之寵併賜御札

合在本年

第一詔
之上

賜岳飛銀絹二千疋兩承信郎恩澤一資母封國夫人
孺人封號二人冠帔三道

勅岳飛

御押

紹興六年

冬十月逆豫之子麟與其妹猊分道入寇或得
吠堯之書于境上賜御札示先臣且勉以報國勘

讎之意

合在本年第六詔之下

古之人見無禮於君者必思有以殺之今劉豫劉麟四
出文勝指朕為孽庶首惡毀斥詬罵無所不至朕固不
德有以招致此言卿蒙被國恩尚忍聞之不動心乎備

錄全文密以示卿主辱臣死卿其念之

付岳飛

御押

紹興七年

先臣既受詔兼統劉光世兵因手疏造膝陳恢
復大計上意感動親批紙尾賜先臣仍寓委屬

褒戒之意

合在本年第一
三詔之下

臣伏自國家變故以來起於白屋實懷捐軀報國雪
復讎恥之心幸憑社稷威靈前後粗立薄效而陛下

錄臣微勞擢自布衣曾未十年官至太尉品秩比三公恩數視二府又增重使名宣撫諸路臣一介賤微寵榮超躡有踰涯分今者又蒙益臣軍馬使濟恢圖臣實何人誤辱神聖之知如此敢不晝度夜思以圖報稱臣揣敵情所以立劉豫於河南而付之齊秦之地蓋欲荼毒中原生靈以中國而攻中國尼雅滿因得休兵養馬觀釁乘隙包藏不淺臣不及此時稟陛下睿筭妙略以伐其謀使劉豫父子隔絕五路叛將還

歸兩河故地漸復則金人之計日生它時浸益難圖
然臣愚欲望陛下假臣日月勿復拘臣淹速使敵莫
測臣舉措萬一得便可入則提兵直趨京洛據河陽
陝府潼關以號召五路叛將則劉豫必捨汴都而走
河北京畿陝右可以盡復至於京東諸郡陛下付之
韓世忠張俊亦可使下臣然後分兵濬滑經略兩河
劉豫父子斷可成擒如此則大遼有可立之形金人
有破滅之理四夷可以平定為陛下社稷長久無窮

之計實在此舉假令汝潁陳蔡堅壁清野商於號畧
分屯要害進或無糧可因攻或難於餽運臣須歛兵
還保上流敵定追襲而南臣俟其來當率諸將或剴
其銳或待其疲敵利速戰不得所欲勢必復還臣當
設伏邀其歸路小入必小勝大入則大勝然後徐謀
再舉設若敵見上流進兵併力來侵淮上或分兵攻
犯四川臣即長驅擣其巢穴敵困於奔命勢窮力殫
縱今年未盡平殄來歲必得所欲亦不過三二年間

可以盡復故地陛下還歸舊京或進都襄陽關中唯陛下所擇也臣聞興師十萬日費千金邦內騷動七十萬家此豈細事然古者命將出師民不再役糧不再籍蓋慮周而用足也今臣部曲遠在上流去朝廷數千里平時每有糧食不足之憂是以去秋臣兵深入陝洛而在寨卒伍有饑餓閃走故臣急還不遂前功致使故地陷敵忠義之人旋被屠殺皆臣之罪今日唯賴陛下戒敕有司廣為儲備俾臣得一意靜慮

不為兵食亂其方寸則謀定計審仰遵陛下成筭必
能濟此大事也異時迎還太上皇帝寧德皇后梓宮
奉邀天眷歸國使宗廟再安萬姓同歡陛下高枕無
北顧憂臣之志願畢矣然後乞身還田里此臣夙昔
所自許者伏惟陛下恕臣狂易臣無任戰汗取進止
三月十一日起復太尉武勝定國軍節度使湖
北京西路宣撫使兼營田大使臣岳飛劄子
覽奏事理明甚有臣如此顧復何憂進止之機朕不中

制惟敕諸將廣布寬恩無或輕殺拂朕至意

右珂先大父維師忠烈鄂國忠武王手奏出師疏真蹟一卷高宗武文皇帝御筆批其後於淳靖康元二之禍酷矣烈矣不勝說矣楚齊代妖王網絕矣先王發憤古艱思澡思雪必欲挽河漢而決之一念既立高厚對越驅馳忽僚叱咤隆缺障橫潰於既倒扶不周於將折此其立志蓋霍去病所謂不立家於匈奴之未滅諸葛亮所謂鞠躬盡死以正祁山之伐裴度

所謂賊未授首臣不還闕千載相望異世同轍勲名
未究卒償權孽此籲天之書所以俯伏天闈泣盡而
繼之以血也手澤散軼百年驚閱寶慶乙酉王春二
月恭獲墨寶仍睹奎札既以伸霜露之痛遂可想風
雲之節百拜泣襲庸附前哲贊曰

於維紹興扶危支傾握校涖戎不識一丁先王奮
嘯起自諸生經通誼明筆妙墨精翠微之詩五嶽
之盟祁陽整旅東松紀行蹟徧九州氣凌三精粵

時出師首茲抗旌規模弗愆忠憤莫摠上心載嘉
奎章式形謂朕何憂惟爾責成以百萬師觀我甲
兵僅四十里復我舊京日却陽侯星隕中營萑血
遂碧狐史漫青天不誘衷昌其底寧傷哉離騷坐
此修能冰鏤玉潔蘭芳芷馨惟皇鑒忠惟人與誠
烈並褒鄂志虧幽并有奕龍跡適昭駿聲遺墨既
刊大猷是經對于廟祧豈惟雲仍

上既付先臣以王德等軍復賜御札諭以先發

制人之意

合在本年第三詔後仍
在出師劉批詔之次

前議已決不久令宰臣浚至淮西視師因召卿議事進
止之幾委卿自專先發制人正在今日不可失也所宜
深悉

付岳飛

御押

先臣既奉詔復奏申述前志以贊上恢復之決

賜御札以報

合在前詔之次仍在
本年第四詔之上

覽卿近奏毅然以恢復為請豈天實啓之將以輔成朕

志行遂中興邪嘉歎不忘至於數四自餘令相臣浚作
書具道惟卿精忠有素朕所簡知謀議之間要須委曲
協濟庶定禍亂卿目疾邇來必好安故茲親諭所宜悉
之

付岳飛

御押

酈瓊之叛張浚始大悔不用先臣言上以瓊素
所信服者惟先臣欲令諭旨許以自新乃賜御

札

合在本年弟
入詔之下

近日鄺瓊領軍北去止緣除楊沂中為淮西制置使衆情疑慮雖瓊忠義有素而不能自信倉卒之間遂成大變朕降親筆與瓊委曲喻之使知朝廷本意乃已不及聞瓊與卿同鄉里又素服卿之威望卿宜為朕選一二可委人持書與瓊曉以朕意若能率衆還歸不特已前罪犯一切不問當優授官爵更加於前朕已復召劉光世不晚到行在瓊之田產布在淮淝諸郡已降指揮令元佃人看守以待瓊歸卿是國之大將朕所倚注凡朕

素懷卿之所悉可子細喻瓊使其洞然無疑復為忠義在卿一言也

付岳飛

御押

紹興九年

先臣自紹興四年平襄漢始興營田之議六年兼使七年進大使至是兵農漸合耕戰交舉上慨然有復古之意賜御書屯田三事

曹操嘗苦軍食不足羽林監潁川棗祗建置屯田於是

以任峻為典農中郎將募百姓屯田於許下得穀百萬斛郡國例置田官數年之中所在積粟倉廩皆滿

諸葛亮與司馬宣王對於渭南每患糧不繼分兵屯田為久駐之基耕者雜於渭濱居民之間而百姓安堵軍無私焉

羊祜都督荊州諸軍事率營兵出鎮南夏開設庠序綏懷遠近甚得江漢之心吳石城守去襄陽七百餘里每為邊害以詭計令吳罷守於是戍邏減半分以墾田八

百餘頃大獲其利祐之始至也軍無百日之糧及至季年有十年之積

賜岳飛

御押

臣聞先正司馬光有言德勝才謂之君子才勝德謂之小人論人者能審於才德之分則無失人矣曹操募百姓屯田許下所在積粟諸葛亮分兵屯田而百姓安堵羊祜懷遠近得江漢之心亦以墾田獲利若三子者知重本務農使兵無艱食其謀猷術略皆不

在人下才有足稱者然操酷虐變詐擊申商之法術
雖號超世之傑豈正直中和者所為乎許劭謂清平
之姦賊亂世之英雄其德有貶云亮開誠心布公道
邦域之內畏而愛之祜增修德信以懷柔初附則德
過於操遠矣觀亮素志欲龍驤虎視包括四海以興
漢室天不假以年遽有渭南之恨祜輔晉武慨然有
并吞之心後平吳身不及見二子有意於功名而志
弗克伸惜哉臣庸德薄才誠不敢妄論古人伏蒙陞

下親灑宸翰鋪述二三屯田足食之事俯以賜臣
敢不策駑礪鈍仰副聖意萬一夫服田力穡乃亦有
秋農夫職爾用屯田以足兵食誠不為難臣不揆願
遲之歲月敢以奉詔要使忠信以進德不為君子之
棄則臣將勉其所不逮焉若夫撫馭遐荒尊強中國
扶宗社於再安輔明天子以享萬世無疆之休臣竊
有區區之志不知得伸與否也紹興十年正月初一
日武勝定國軍節度使開府儀同三司湖北京西路

宣撫使兼營田大使武昌郡開國公食邑四千戶食
實封一千七百戶臣岳飛謹書

臣珂竊惟因田寓兵肇自黃帝立井之灋冊籍維
見乘馬兵車規撫有秩眩於宗周百王不易紊以
內政散以阡陌醜七而後一無復遺漢更代來稍
示存古策臣班議募田實邊以屯積衆此馬權輿
渠犂以還間及內地愈變愈下猶存府兵五閏不
綱定霸創名判乎二岐殆不復合高宗皇帝英智

遠覽挺生百代之下奮然永嘅欲合兵農而一之
環睨在廷莫當上意疇咨已試通觀厥成迺寓奎
章屬下逮先臣是時營田已有成畫矣畛錯畎繡
沃野相接事至不竭農皆可戰營壘棊布車閑馬
飭閒居弗饋士亦服耕藹然千古之遺規蓋可想
見地不改墾兵不改籍因其已行而措其未備宜
若易然而先臣下方之書迺獨遲之何也夫因變
以制宜而激成於欲速襲媮就狹豈所謂以堯事

君者漢事駁矣已無足議世更鼎峙隨地置兵各據偏方以相抗衡革舊俗還王制以振方來之陋於時乎何有此蓋先臣之所甚惜而才德之辨姑致其意思有以廣上心尤夙夜之所卷卷反覆數子之行事或形於慨慕或見於嘆息一予一奪而愛君之心寓焉不計歲月之近效而使數百世之下有能見井田之髣髴則頻視三國固先臣之所不屑為而馴致其道等而上之庶幾乎其可也倣

茲以觀事不勝異矇媚參至卒殉以身區區興漢
終不足以勝酷虐變詐者之謀而凡渭南峴首之
所以不獲要其終此論者必以歸之天也還觀餘
旨其伸與否蓋皆先臣之所不敢計而其遺跡之
僅存者且至于今賴之簣土虧成萬不一究世之
士猶執時異事變之說而諉之不可復行盍亦反
其本而已蓋至於是而古人之長計遠慮均為空
言日就湮汨而先帝大有為之志孤矣揆今肇古

可勝咤哉臣因次第藏詔而得是書重悲先臣之言追頌聖意專寫誕略繫于撫遺之末云

御賜舞劍賦

將軍以幽燕勁卒耀武窮髮俘海寇靖山羯左執律右秉鉞振旅聞闐獻功于魏闕上享之則鐘以捍簾鼓以靈鼉千伎度舞萬人高歌秦雲動色渭水躍波有肉如山有酒如河君臣樂飲而一醉夷夏薰薰而載和帝謂將軍拔劍起舞以張皇師旅以烜赫戎虜節八音而行

八風奮兩階之干羽公於是貝冑朱綬而正色虎裘錦
褱而攘臂抗稜威飄銳氣陸離于武備婆娑乎文事合
桑林之容以盡其意照蓮花之彩以宣其利翕然鷹揚
翼爾龍驤鋒隨指顧鏑應徊翔取諸身而聳躍上其手
而激昂縱橫耀穎左右交相觀乎此劒之躍也乍雄飛
俄虎吼搖輓轡射牛斗空中悍慄不下將久歛風落而
雨來果愜心而應手爾其凌厲清浮絢練夔絕青天兮
可倚白雲兮可決覩二龍之追飛見七星之明滅雜朱

干之逸勢應金奏之繁節至乃天輪宛轉貫索迴環光
冲融乎其外氣混合乎其間若湧雲濤如飛雪山萬夫
為之雨汗八佾為之慙顏及乎度曲將終發機尤捷或
連翩而七縱或瞬目而三接風生兮旌旆襜褕電走兮
彤庭晔晔陰冥變見靈恠離獵將鬼神之無所遁逃豈
蠻戎之不足震懼嗟夫蘭子之迭躍其技未雄仲由之
自衛其舞未工曷若將軍為百夫之特寶劔有千金之
飭奮紫髯之游刃發帝庭之光色所以象大君之功亦

以宣忠臣之力或歌曰洸洸武臣耀雄劒兮清邊塵威
遠夷兮率來賓焉用輕裾之妓女長袖之才人天子穆
然詔伶官斥鄭衛選色者使覘乎軍容教舞者使覘乎
兵勢變激楚之結風為發揚之蹈厲僉謂將軍之劒舞
古未之制

右高宗武文皇帝御書賜先臣飛唐喬潭裴將軍舞
劒賦按文粹賦在第四卷中臣珂家藏天筆盈笈大
概皆兵事節度臣固嘗具之甲子奏篇惟是書以游

戲翰墨渙錫光寵故弗及載有御書璽及己未小璽
以殿于篇臣既系寶章復伸螽測輒陳蕪替式著宸
心贊曰

維中興焯人文燁皇靈即清燕垂翰墨光日星揖
蛙怒市駿骨期混并寫古作示休寵作豪英臣有
劍淬三河苞兩京舞絕世決浮雲開太清帝有訓
誓臣節式欽承誰掣肘起奮哀憤裂纓鬱千將在
寶匣長悲鳴後百年血郅支鐸尚腥刻斯石表帝

心傳龍庭

金仙續編卷一

欽定四庫全書

金佗續編卷二

宋 岳珂 撰

絲綸傳信錄卷一

記功莫大乎紀實垂世莫難乎傳信實不徒紀也必有所託而後信足以傳乎久信不苟傳也必有以驗其所託而後信其實之為不誣此二者迭相為用而不可以偏廢也且世之立勲能著名謚寓諸史牒絲

古而今凡幾何人隱蹟與行述於狀嘉謨顯德表於碑逸事故聞誅贊叙紀雜出於志士文人之手是皆足以為實也然而家庭之所上則或疑於夸託名於人則或疑其諛墓至於後世追述倣象激揚褒揄上史官而詒輯錄又或以其耳目不接誤於剽聞者而疑之然則實烏乎託而信亦豈易傳哉嗚呼是固可疑也生乎斯時同乎斯時目擊而傳之斯足以為信矣曰存乎其人未可以輕信立言之大儒篤信之君

子許可之不苟而又出乎同時蓋確乎其可信也曰
是惡所据依而言之如是則終無可託者耶曰事同
時功同志其矢言之實者莫切乎君臣之間制詔之
出於其時者非一人之為也鑾坡鳳池公論所正上
焉而視草進覽必有以當乎上心下焉而廷揚驛布
必有以合乎人心如曰眠功進律則一時之功狀必
嘗覆于有司獎諭批答則一時之指意必嘗臬于睿
斷其它行諸堂帖下之故府又俱有宣底之存被旨

之日此而不傳則是信也無復可託者矣此子孫之責而是錄之所繇作也始魏國韓忠獻公作家傳凡制詔皆散于編年之中珂弱冠彙奏篇蓋嘗竊以為不然謂事跡間斷則不便於覽讀紀載雜揉則有乖於聯合因刪其文而摭其意以為如是亦足以傳既上之蘭臺矣已而繙故書刻本時見事蹟與當時王言相表裏者率不一二見予心雖瞭然而或者持叩顙末則弗能以枚告輒慨然曰此珂之罪也事增於

前文損於舊昔之作史者已難之矣而予獨可以輕
變哉編年既不可續入則別彙為錄名之曰絲綸傳
信抑使後之觀者知予之於所傳於所託可信蓋如
此堯言布天下其在萬世尚庶幾於如見云紹定改
元端午岳珂謹序

紹興二年

中衛大夫武安軍承宣使告

六月十一日

勅朕思將帥之臣為社稷之衛克戡多難以靖四方厥

有茂功宜膺優渥親衛大夫建州觀察使神武副軍都
統制岳飛爲時良將統我銳師許國惟以忠誠馭衆亦
能訓整同士卒之甘苦致紀律以嚴明宣力久勞戰多
實著功加數路跡掃羣兇遂行橫列之遷兼付承流之
寄悉平嶺嶠既成破賊之功威著江淮益峙禦戎之略
其承異寵克勵壯猷可特授中衛大夫武安軍承宣使
依前神武副軍都統制

紹興三年

鎮南軍承宣使充江南西路沿江制置使告

月九

勅全師楸賞必首正中權之功謀帥授方爰控制上流
之重若時名將為國虎臣屢列上於戰多式載圖於臨
遣併頒命渥增重戎昭中衛大夫武安軍承宣使神武
副軍都統制岳飛秉誼忠純賦資沉毅自奮庸於行陣
久宣力於方維料敵出奇洞識韜鈴之奧摧鋒決勝身
先矢石之危荐率偏師往平巨孽屬江西之竊發連嶺
表之繹騷命以專征迄茲底定殲滅兇渠之惡蕩平狡

窟之姦千里師行見秋毫之無犯百城安堵聞犬吠之
不驚嘉爾凱還趣其入覲念夙殫於忠節尚辰告於壯
猷宜疏進律之恩俾正承流之任天設之險擇形勢於
九江師克在和隱兵威於萬旅以作藩于屏輔以式遏
於寇攘茲申紀律之嚴用謹守攻之備往服朕命無怠
爾成可特授鎮南軍承宣使依前神武副軍都統制充
江南西路沿江制置使

紹興四年

清遠軍節度使湖北路荆襄潭州制置使特封

武昌縣開國子食邑五百戶食實封貳百戶制

月八

二十
五日

門下師直為壯正天討有罪之刑戰功曰多得仁人無
敵之勇羽奏屢騰於戎捷輿圖亟復於圻封肆疇進律
之庸亶告治朝之聽鎮南軍承宣使神武後軍統制充
江南西路舒蘄州兼荆南鄂岳黃復州漢陽軍德安府
制置使岳飛精忠許國沉毅冠軍身先百戰之鋒氣蓋

萬夫之敵機權果達謀成而動則有功威信著明師行而耕者不變久宣勞於邊圉實捍難於邦家有公孫謙退不伐之風有叔子懷柔初附之略屬兇渠之嘯亂乘襄漢之弛兵竊據一隅萃厥逋逃之藪旁連六郡鞠為盜賊之區命以徂征迄茲戡定振王旅如飛之怒月三捷以奏功率寧人有指之疆日百里而闢土慰我后雲霓之望拯斯民塗炭之中嘉乃成功楙茲信賞建旄融水以彰分閭之專授鉞齋壇以示元戎之重全付西南

之寄外當屏翰之雄開茅社於新封錫圭腴於真食併
加徽數式對異恩於戲我伐用張既收無競維人之烈
惟辟作福敢後有功見知之圖尚肩衛社之忠益勵幹
方之績欽予時訓其永有辭可特授清遠軍節度使湖
北路荆襄潭州制置使依前神武後軍統制特封武昌
縣開國子食邑五百戶食實封貳百戶主者施行

紹興五年

兩鎮節度使加食邑制

二月一日

門下聖人順天地之動師必有名王者馭中外之權兵
應者勝迺睠中堅之略叶平外侮之虞肆圖厥功誕告
爾衆清遠軍節度使湖北路荆襄潭州制置使神武後
軍統制武昌縣開國子食邑五百戶食實封貳百戶岳
飛才全果毅資稟沉雄說禮樂而厲廉隅德遜有君子
之操援枹鼓而先士卒忠蹇匪王臣之躬自奮武以專
征屢摧堅而深入于疆于理威行江漢之山川如飛如
翰名動江淮之草木屬逆徒之挺亂導勁敵以窺邊萬

騎鼓行震天聲於不測千里轉戰奮勇氣於方張力捍
孤城系俘羣醜逮潛師而犇潰茲振旅以邁歸載疇却
敵之庸用錫相攸之祉齋壇授鉞節兼兩鎮之雄太社
分茅爵列元侯之貴倍敦井賦衍食畬租爰示寵光併
昭物采於戲觀萬夫之政爾惟肇敏於戎公宅九有之
師我其克艱於王業祇若予訓永肩乃心往恢式辟之
方勿替對揚之命可特授鎮寧崇信軍節度使依前神
武後軍統制充荆湖南北襄陽府路制置使進封武昌

郡開國侯加食邑五百戶食實封貳百戶主者施行

四年明堂加食邑五百戶食實封貳百戶制月

二十
三日

門下朕躬履艱虞祇膺眷祐淵冰厲志靡忘顧諟之誠
珪幣薦衷用格況臨之祉爰推惠衍式獎忠勞鎮寧崇
信軍節度使神武後軍都統制充荆湖南北襄陽府路
制置使武昌郡開國侯食邑一千戶食實封肆百戶岳
飛策慮靖深器資沉毅有冠三軍之勇而計然後戰有

長萬夫之才而謙以自持鏖兵無前並票姚之方略襲
敵知避竦飛將之威名治紀律以甚嚴嘉師徒之逾整
既宣威於南紀亟奏凱於淝川載加齋鉞之崇增重元
戎之寄方合宮之竣事乃大賚以疏封增衍爰田益陪
真食用作爾祉庸示眷懷於戲良將以功名為先期輔
成於丕烈忠臣乃社稷之衛宜勉卒於令圖朕方謹邊
場之虞卿宜厲爪牙之用體茲訓告務克欽承可特授
依前鎮寧崇信軍節度使神武後軍都統制充荆湖南

北襄陽府路制置使加食邑五百戶食實封貳百戶封如故主者施行

檢校少保加食邑制

九月十一日

門下若昔帝王之經武本七德以和衆安民惟我祖宗之有邦逮百年而勝殘去殺眷彼南服遠於朝廷赤子弄兵始由失職一方受病迄至用師迺嘉將帥之良能盡威懷之義肆颺孚號庸報楸功鎮寧崇信軍節度使神武後軍都統制充荆湖南北襄陽府路蘄黃州制置

使武昌郡開國侯食邑一千五百戶食實封陸百戶岳
飛忠力濟時忱誠徇國沉勇多算有馬燧制敵之機廉
約小心得祭遵好禮之實自出陪於艱運久專總於戎
昭鋒對無前以征必克師行有紀所至孔安成績著于
邦家威名震於遐邇比飭鷹揚之旅往臨鼠盜之區孚
以惠心開其善意得好生於朕志新舊染於吾民支黨
內攜爭掀校窟渠魁面縛自至和門服矢弋弓盡散潢
池之嘯聚帶牛佩犢悉歸田里之流逋清湖湘累歲蕩

汨之菑增秦蜀千里貫通之勢惟時底績可後疇庸孤
棘位朝其視儀於亞保戎駢導節仍疊組於中權肇開
公社之封益衍圭腴之賦於戲出車之勞還率所以知
臣下之勤彤弓之錫有功所以慶人君之賞往對揚於
休命終克勵於壯猷尚弼一人永清四海可特授檢校
少保依前鎮寧崇信軍節度使神武後軍都統制充荆
湖南北襄陽府路蘄黃州制置使加食邑五百戶食實
封貳百戶進封開國公封如故主者施行

紹興六年

武勝定國軍節度使充湖北京西路宣撫副使

置司襄陽加食邑制

三月二日

門下朕還顧宛洛之郊旁連江漢之紀人謀誤國致赤
子之淪胥祖武造邦本皇天之全付思拯民於水火用
申畫於山川即命元戎往分憂寄亶茲有衆咸聽朕言
檢校少保鎮寧崇信軍節度使神武後軍都統制充荆
湖南北襄陽府路蘄黃州制置使武昌郡開國公食邑

二千戶食實封八百戶岳飛沉毅而閔中誠純而特立
縱橫奇正謀足以應料敵之幾險阻艱難器足以任扶
危之重志徇國家之急身居矢石之先翦亂夷凶所當
者破陳師鞠旅其衆無譁乃眷西南久勤經略將規恢
於遠馭宜增重於使權草木知名諒威聲之震讐旌旗
改色亦士勇之賈前矧茲塗炭之餘積有雲霓之望洛
都甫邇王氣猶在於伊瀍陵寢具存廟貌未移於鍾簾
其共乃服以究爾庸易兩鎮之戎旃就顓節制衍多田

之幹食益侈輿封斷自予衷豐茲異數蓋示龍光之渥
式昭間寄之隆於戲整六師以修戎朕既得惟人之競
辟四方而徹土爾其恢綏遠之猷惟一德以定功茲萬
邦而為憲往欽無斁其永有辭可特授武勝定國軍節
度使依前檢校少保充湖北京西路宣撫副使兼營田
使襄陽府置司加食邑五百戶食實封二百戶封如故
主者施行

內艱起復制

九月

門下考禮則喪無二事心獨致梧槨之思命將而任重
三軍義在先國家之急眷時間制屬我傑才方膺易鎮
之榮奄及終堂之恤肆揚出綍數告在廷持服前檢校
少保武勝定國軍節度使充湖北京西路宣撫副使兼
營田使襄陽府置司武昌郡開國公食邑二千五百戶
食實封一千戶岳飛精深而善謀沉鷙而孔武被威名
於草木昭勲績於旂常國爾忘家厲票姚辭第之志卑
以自牧履馮異不伐之謙本忱恂之確誠形純篤之內

行出從王事每切望雲之情入慰母心初無鬻臂之誓
期永就養遽遭閔艱念乃情重罹於至憂軫予心良增
於深惻屬此幹方之日豈曰居廬之時雖難忘顧復之
厚恩可少怠憑陵之宿憤朕當饋而歎中夜以興思有
指之土疆倚圖上之方略斯拱而俟趣起勿遲仍視亞
保之威儀載畀兩藩之旄鉞用昭隆眷佇奏膚公於戲
魯侯即喪而誓師平徐夷之作難晉人始墨而變禮由
殺嶺以從戎若功名克顯於君親則忠孝兼全於家國

勉服成命益勵壯猷可特起復檢校少保武勝定國軍
節度使充湖南京西路宣撫副使兼營田使武昌郡開
國公食邑二千五百戶食實封一千戶依舊襄陽府置
司主者施行

紹興七年

起復太尉加食邑制

二月二十五日

門下天生五材莫大乎用兵之利戰有百勝孰踰於得
筭之多粵若信臣妙持軍律援桴擐甲屢收既克之功

飲至策勲更勵方來之效咨爾在位明聽朕言起復檢校少保武勝定國軍節度使充湖南京西路宣撫副使兼營田使武昌郡開國公食邑二千五百戶食實封一千戶岳飛沉毅而有謀疏通而善斷威加敵人而其志方厲名著甲令而其心愈剛有慮而後會之機有誓不俱生之勇曩者分遣將士深入敵巢存聞斬馘之奇盡據山川之險至於牛蹄之役尤嘉虎鬪之彊積獲齊山俘繫載道令行塞外已觀奮擊之無前響震關中將使

覆亡之不暇是用躋榮掌武加重元戎玉佩絳裳備殊
勲之典禮雕戈金節增上將之威稜仍衍爰田倍敦真
食以厚褒揚之寵以明待遇之隆於戲朕不愛爵祿而
用才庶幾無負汝宜竭股肱而報上思稱所蒙往圖竹
帛之光勉徇國家之急則朕克濟垂成之業而汝亦有
無窮之聞可特起復太尉依前武勝定國軍節度使湖
北京西路宣撫使兼營田大使加食邑五百戶食實封
二百戶主者施行

明堂加食邑五百戶食實封二百戶制

詞闕

紹興九年

開府儀同三司加食邑制

正月十一日

門下蒐卒乘而繕甲兵尤謹艱難之日聽鼓鼙而思將
帥不忘閒暇之時迺眷爪牙之臣夙勤疆場之衛爰加
集律丕告治廷太尉武勝定國軍節度使充湖北京西
路宣撫使兼營田大使武昌郡開國公食邑三千五百
戶食實封一千肆百戶岳飛票衛有聞沉勇多算有岑

公之信義足以威三軍有賈復之威名足以折千里臨敵而意氣自若決策則機智若神陷陣摧堅屢致濯征之利撫劔抵掌每陳深入之謀眷彼荆襄實勤經略邊鄙不聳幾卧鼓而滅烽流亡還歸皆授田而占籍奠茲南紀隱若長城屬鄰邦講好之初念將閭宣勞之久肆因慶澤式表高勲是用進同三事之儀仍總兩藩之節行封多井增實腴租以昭名器之崇以就龍光之渥於戲豐報顯賞蓋以褒善而勸功遠慮深謀尚思有備而

無患祇若予訓益壯爾猷可特授開府儀同三司依前
武勝定國軍節度使湖北京西路宣撫使兼營田大使
加食邑五百戶食實封三百戶封如故主者施行

紹興十年

少保兼河南府路陝西河東河北路招討使加

食邑制

六月一日

門下除凶翦亂救民本仁義之兵料敵出奇命克必神
明之將眷予閫帥久撫戎昭俾宣布於皇靈用外攘於

寇侮惟日之吉敷告于廷武勝定國軍節度使開府儀
同三司充湖北京西路宣撫使兼營田大使武昌郡開
國公食邑四千戶食實封一千七百戶岳飛智合鞞鈴
靈鍾河岳氣吞彊敵壯哉漢將之威稜志清中原奮若
晉臣之忠槩師屢臨於京洛名遠震於荒要念國步之
方艱顧禍心之未革詭謀行詐以為欺侮之計阻兵怙
亂以重塗炭之災信義俱忘羣情共惡殘虐不道神理
靡容其遂整於我師用奉行於天討默用萬全之計亟

收九伐之功乃寵畀以使名斯示濯征之義仍進躋於
孤棘特隆委寄之權於戲一弛一張文武乘時而致用百
戰百勝方略因敵以為師舉素定之成謀攄久懷之宿
憤往底必禽之利丕昭不世之勲勉爾壯猷欽予時命
可特授少保依前武勝定國軍節度使充湖北京西路
宣撫使兼河南北諸路招討使兼營田大使加食邑七
百戶食實封三百戶封如故

明堂加食邑七百戶食實封三百戶制

詞闕

紹興十一年

樞密副使加食邑制

四月二十四日

門下朕躬履多虞規恢大業惟文武並用式嚴宥密之
司必知勇兼全克任本兵之寄睠時人傑久總戎昭肆
疇勲望之隆俾贊樞機之要誕敷渙號敷告明廷少保
武勝定國軍節度使充湖北京西路宣撫使兼河南北
路招討使兼營田大使武昌郡開國公食邑五千四百
戶食實封二千三百戶岳飛果毅而明深沉以武奇謀

祕計蚤推韜略之高英，聚雄姿凜有威名之盛。自服勤於邊圉，實修捍于邦家。作鎮上流，屹若金湯之勢；宣威遐俗，震于寇賊之羣。功屢紀於旂常，任實同於柱石。念提兵百戰，已深料敵制勝之方；而授任一隅，未究折衝消難之略。鬱雄圖而弗展，慨平世之何時。是用蔽自朕心，付以國柄。參昴事樞之重，仍班孤棘之榮。近資發縱指示之奇，遠輯摧陷廓清之績。庶極用人之效，亟成戡亂之圖。於戲！上下交而志同，朕方深於注意；將相和則

士附爾益務於叶心其懋壯猷用服明訓可特授樞密副使依前少保加食邑七百戶食實封三百戶封如故主者施行

武勝定國軍節度使萬壽觀使奉請制

八月

門下聯樞筦而贊廟謨式重股肱之寄擁節旄而奉朝請益隆體貌之恩乃睠勲臣方居密席遽瀝退身之懇盍推從欲之仁爰告大廷用孚爾衆少保樞密副使武昌郡開國公食邑六千一百戶食實封二千六百戶岳

飛稟資肅毅挺質沉雄方略得古良將之風忠勇有烈
丈夫之操奮身許國彰趙士之曼纓勵志圖功撫臧宮
之鳴劍自總幹方之任久專制閫之權惟績用之殊尤
亦恩褒之備至戎駢導節既疊組於大邦孤棘位朝遂
進班於亞保茲圖茂閎俾翊洪樞庶資籌幄之奇以輯
平戎之略歟煩言之荐至摘深鑿以交攻有駭予聞良
平衆望朕方記功掩過事將抑而不揚爾乃引咎自言
章既卻而復上諒忱誠之已確雖敦諭而莫回是用崇

使範於殊庭昇齋壇於舊服留以自近示不遐遺以全終始之宜以盡君臣之契於戲寵以寬科全祿光武所以保功臣之終曾無貳色猜情鄧公所以得君子之致朕方監此而御下爾尚念茲而事君往哉惟欽服我明訓可特授武勝定國軍節度使依前少保充萬壽觀使仍奉朝請主者施行

金匱續編卷二

欽定四庫全書

金佖續編卷三

宋 岳珂 撰

絲綸傳信錄卷二

紹興二年

蓬嶺敗曹成獲捷撫諭將士詔

勅岳飛下一行將士等比緣逋寇未即天誅既蹂躪於
湘南又窺覲於嶺表顧作民父母豈朕志之敢寧而為

國爪牙繫汝曹之可仗爰整貔貅之旅往夷蜂螳之羣
一心爭先再戰皆克緬維忠力深用歎咨屬此暑時方
當窮討重念征行之遠能無暴露之勤勉服顏行亟平
氛稔更趨後效毋替前功併需飲至之期優議策勲之
典宜令岳飛一一記錄將士勞績候賊平日參酌功效
高下開具聞奏當議優與推恩故茲詔示想宜知悉

紹興三年

辭免鎮南軍承宣使不允詔

勅具悉朕以九江之會衿帶武昌控引秋浦上下千里
占江表形勢勝地宿師遣戍而以屬卿增壯軍容併加
使號蓋圖乃績顧匪朕私維卿殄寇之功馭軍之略表
見於時為後來名將江湖之間尤所欣賴兒童識其姓
字草木聞其威聲則夫進秩授任就臨一道豈特為卿
褒寵亦以慰彼民之望其尚何辭所辭宜不允

紹興四年

辭免神武後軍統制不允詔

勅具悉朕惟荆楚之郊自昔用武之地以卿有憂國濟
時之志有馭衆却敵之威故命以專制西南一面之重
比提王旅深入盜區折馘執俘所向必克輿圖所復幅
員千里朕方圖爾之功以觀厥成遽覽需章亟辭舊職
殆非朕之所期於卿者也勉服至意毋復有陳所辭宜
不允

辭免清遠軍節度使湖北路荆襄潭州制置使
特封武昌縣開國子食邑五百戶食實封二百

戶不允詔

勅具悉朕惟明主不吝賞所以求社稷之臣良將不言
功所以恤國家之難上下相與古今一途卿稟雄勁之
姿蘊深湛之慮識通機變忠貫神明鼓勇無前服勞先
於士卒執謙不伐行事合於詩書比總偏師克平禍亂
坐復六州之故地用蘇千里之疲氓嘉爾設施出於談
笑既策勲之甚茂宜班爵之特優建大將之鼓旗往臨
三路授元戎之鈇鉞增重六師奚為遜牘之陳猶避寵

章之渥亟膺明命益勵遠圖庶見方隅綏靖之期乃稱朝廷崇獎之意所請宜不允

再辭免同前不允詔

勅具悉卿忠義出於天資忱恂著於臣節志徇國家之急身先行陣之勞蓋嘗推功名而不居豈復私富貴以爲意然賞國之典輕重眎功師不淹時役不再籍連克六城之聚復還千里之疆振凱遄歸策勲可後謙以自牧卿雖必欲執三命之恭賞或失勞朕將何以為萬夫

之勸勉服成命毋復費辭所辭宜不允

紹興五年

辭免鎮寧崇信軍節度使進封武昌郡開國侯
加食邑五百戶食實封二百戶不允詔

勅具悉屬者襄漢之舉旌旗所指勢若破竹盪平六郡
役不再籍是用建爾節旄授之斧鉞以臨融水之師而
秉義抗辭至于再三今寇兵內侮蹂踐兩淮獨提虓旅
徑絕大江鼓行西向以挫其鋒折馘執俘厥功茂焉朕

載披輿圖惟鎮寧崇信為時重鎮併是兩節肆以命卿
迺復逡巡懇避形於奏牘德遜之美功成弗居雍容可
觀士論稱歎雖謙終可以保吉然信賞所以示公朕命
不移往其祇服所請宜不允

再辭免同前不允詔

勅具悉朕不愛爵賞以勸有功授受之間期於無愧出
節少府疊組巨藩匪時雋功夫豈輕畀卿當堅忠義之
素節念恢復之遠圖迄觀厥成以稱朕命思其大者毋

事小廉所請宜不允

第三辭免同前不允詔

勅具悉卿愷旋振旅入覲于廷舍爵策勲賞不淹晷朕
非以是寵卿也謂名器天下之至公而爵祿人主之利
勢有功不賞朕將何以使能無言不酬卿亦思所以報
上苟曰無愧豈必固辭所請宜不允仍不許再有陳請
自池州移軍潭州獎諭詔

勅卿遠提貔貅往戍潭湘連萬騎之衆而桴鼓不驚涉

千里之塗而樵蘇無犯至發行賞之泉貨用酬迎道之
壺漿所至得其歡心斯以寬予憂顧嘉治軍之有法雖
觀古以無慚乃眷忠忱益加咨歎故茲獎諭想宜知悉

招捕湖湘寇戒諭將士詔

勅岳飛眷彼南服遠於朝廷吏情弗虔民貪為盜稍乘
虛而肆暴因恃險以逋誅爰命烝徒往平狡窟言念驅
率良善多出於脅從誘致流亡或成於誑誤按罪止誅
其首惡招來餘許其自新而主將非人師行失律帥守

無一方之任固思叶力以濟功漕臣分兩路之權乃欲
便文而專制爭快一時之忿陰懷首鼠之端原其本心
實阻軍事坐糜歲月未撤師屯環視湖湘久纏兵革焚
剽之禍既延及于平民饋餉之煩復重勞於編戶旰宵
在念塗炭興嗟比者易將授方濟師底伐必期平蕩以
靖方隅凡茲牧守郡縣之官爰墮金穀轉輸之任並修
厥職惟乃一心如敢玩寇妨功徇私懷貳或應援之有
愆機會或饋運之有乏軍興大則誅殛以正典刑小則

竄流以禦魑魅法茲無赦朕不敢私載念遺黎屢經調度財力為之凋瘵耕織至於失時祗俟賊平優加恩恤如有出奇畫計奮戰摧鋒共懷敵愾之心助成破賊之勢高爵重祿當報爾功朕言不渝衆聽毋忽故茲戒諭想宜知悉

殺楊么賜詔獎諭

勅岳飛湖湘阻深姦克嘯聚曩命往伐用非其人輕敵寡謀傷威損重遂令孽寇久稽靈誅卿勇略冠軍忠義

絕俗肅將王命隄集長沙威稜所加已聞聲而震疊恩
信既著宜傳檄而屈降消時內侮之虞宜予不殺之武
盜區肅靜南服妥妥載念殊勲不忘嘉歎故茲獎諭想
宜知悉

乞罷制置使畀以祠祿不允詔

勅具悉任才者常患不能盡其用建功者常患不克圖
厥終儻匪上下之相符是為古今之深戒卿肅持將鉞
勤宣王靈北定荆襄南清湖嶺恩信甚洽威名益彰欲

資帥聞之雄增重上游之勢忽覽奏牘祈解使權屬茲
艱虞方深注倚遽求閒逸殊駭聽聞俾朕貽用才不盡
之譏在卿乖圖功攸終之義揆之於理夫豈宜為卿當
厲忠憤之素心雪國家之積耻勉副朕志助成大勲往
體眷懷勿復有請所請宜不允

辭免檢校少保進封開國公加食邑五百戶食
實封二百戶不允詔

勅具悉湖湘之役翫寇老師累年于茲一方受弊卿往

據遠略迄定內虞擣其巢窟離其支黨係致元亞綏靖
良民厥功懋矣賞國之典豈朕敢私成命既孚師言維
允毋庸謙執其亟欽承所辭宜不允

辭免湖北襄陽府路招討使不允詔

勅具悉卿紀績旂常視儀孤棘式嚴閭制增重使權名
非苟以假人位必期於稱德尚茲謙執殆弗眷懷難得
者時當畢力功名之會有勞於國亦何嫌爵祿之加亟
服懋恩益思來效所辭宜不允

紹興六年

辭免易武勝定國軍節度使宣撫副使加食邑
五百戶食實封二百戶不允詔

勅具悉漢高帝一日得韓信齋戒築壇拜為大將授數
萬之衆雖舉軍盡驚而高帝不以為過與待絳灌樊鄴
輩計級受賞者蓋有間矣豈非用人傑之才固自有體
邪卿智勇兼資忠義尤篤計無遺策動必有成勲伐之
盛焜耀一時豈與淮陰侯初遇高祖為比哉朕之報功

者褒顯已厚爵位已崇今復侈大使名用尊重于閭
寄所以示優異之寵不為越而卿辭之何也往祗茂恩
毋復有請所辭宜不允

辭免起復不允詔

勅具悉委質為臣義無有已要經服事禮有從權雖陟
屺之思恩莫隆於母子而枹鼓之急身必先於國家矧
三軍之耳目待其指縱一時之利害間不容髮豈可忽
安危之大計謹苦塊之私哀爾其擇忠孝之宜審重輕

卷三
之勢亟視軍政往赴事機所請宜不允仍不許再有陳請依已降指揮日下主管軍馬措置調發不至失機會

復商虢二州及偽鎮汝軍撫問詔

勅叛臣逆命屢寇邊垂長策待時始行天討卿義不避敵智能察微密布銳兵指縱裨將陳師鞠旅進貔虎以憑陵斬馘執俘戮鯨鯢於頃刻遂復商於之地盡收虢略之城夫瑕叔盈麾螭弧以登勇聞舊許公子偃蒙臯

比而犯功止乘丘猶能著在遺編名垂後世有如卿者
抑又過之長驅將入於三川震響傍驚於五路握兵之
要坐圖累捷之功奪人之心已懾羣凶之氣精忠若此
嘉歎不忘故茲撫問想宜知悉

寇成等擅殺敵兵宣諭戒勵諸軍詔

勅國家以削平禍亂安定中原遂至行師本非得已並
用威懷之略不專誅伐之圖蓋念中原之民皆吾赤子
迫於暴虐之故來犯王師自非交鋒何忍輕戮庶幾廣

列聖好生之德開皇天悔禍之衷卿其明體朕懷深戒將士務恢遠馭不必專威凡有俘擒悉加存撫將使戴商之舊益堅思漢之心蚤致中興是為偉績毋或貪殺失朕訓言故茲宣諭想宜知悉

行軍襄漢正當雪寒撫諭將士詔

勅岳飛一行將士軍兵等叛臣不道竊據中原賴七廟之威靈尚存遺澤致四方之忠義皆有奮心惟爾一軍備經百戰遙聞征殺頗犯雪寒以予露蓋之勞知爾執

戈之苦眷言體國良極歎嘉重念忘身又興惻怛所恨
阻脩之道路不能親撫於師徒惟深體於眷懷務亟成
於偉績故茲撫諭想宜知悉

紹興七年

辭免起復太尉仍加食邑不允詔

勅具悉朕以邊陲作難姦偽乘時命南征北伐之師得
戰勝攻取之將冀攘羣醜以底丕平卿為國爪牙董茲
貔虎功收江漢之表聲震河洛之郊大破逆徒進臨要

地秋毫亡害既昭布於上恩壺漿以迎遂撫寧於舊俗
佇戡大慙亟靖中原屬茲振旅而還式示告廷之寵惟
將軍膺制閫之命能辟國以宣威而太尉乃掌武之官
用策勲而懋賞斯為甚稱其勿固辭所請宜不允

再辭免起復太尉仍加食邑不允詔

勅具悉凡賞無常輕重眎功周之制也太尉古官昔在
三公之右今同二府之列艱難以來尤重茲任非有大
功不以命之卿一時人傑董戎旅百戰百勝厥功茂

焉日者淮蔡之戰王命將通於洛邑商號之役威聲已振於秦川我圖爾功宜有重賞是用建爾久虛之位崇以輔臣之禮蓋將以勸天下之有功者而非以為卿私也何為固辭殊拂朕意其祇成命毋復重陳所辭宜不允

辭男特轉三官授武略大夫所請宜允詔

勅具悉朕以卿肅提師律進辟土疆功在必酬既舉策勲之典寵惟無斁用昭延賞之私卿乃力抗封章推先

將士謂名器之虛授將磨厲以何繇朕思其言所見者
遠蓋不特固執謙遜耻同漢將之爭功而使其自立勲
勞復見西平之有子載深嘉歎姑務勉從所請宜允

上章乞骸有旨不允繼赴行在入見待罪降詔
慰諭

勅岳飛省劄子奏臣妄有奏陳乞骸之罪明正典刑以
示天下臣待罪事具悉朕究觀自昔之將帥固不歸重
於朝廷蓋將既尊君則下知從令協致爪牙之利用成

社稷之功此所以名書鼎彝慶流孫子而君臣並受其福者也卿識洞韜鈴天資忠孝龍驤虎視聲動四方眷遇之隆超越今昔而乃誤於聞聽輕有奏陳及承命而造朝能抗章而引咎深達君臣之義尤知名分之嚴維石慶之以謹聞吳漢之自譴責質之古道何以加諸夫有志者事必成無咎者善補過本無瑕吝何以謝為三復忱辭不忘嘉歎故茲詔示想宜知悉

張宗元奏軍旅精銳獎諭詔

勅朕致天之討仗義而行秉律成師誓清乎寇祲整軍
經武必藉於虎臣眷予南服之區實捍上流之勢卿肅
持齋鉞洞照玉鈴茹苦分甘與下同欲裹糧坐甲唯敵
是求旗甲精明卒乘輯睦士聞金鼓而樂奮人懷忠孝
而易從動焉如飄風固可以深入延之如長刃何畏乎
橫行覽從臣之奏封知將帥之能事卿誠如此朕復何
憂想鉅鹿李齊之賢未嘗忘者聞細柳亞夫之令稱善
久之故茲獎諭想宜知悉

金佗續編卷三

欽定四庫全書

金佗續編卷四

宋 岳珂 撰

絲綸傳信錄卷三

紹興九年

辭免開府儀同三司加食邑五百戶食實封三百戶不允詔

勅具悉朕永念艱難之日未酬於戰多逮茲恢復之時

不忘於武備爰頒渙寵用表殊勲蔽自朕心非云濫典
卿疎通而能斷果毅而有謀勲載旂常令行褒漢眷惟
休渥允協師言何未諒於忱誠尚或形於謙遜朕命不
易可無復辭所辭宜不允

再辭免同前不允詔

勅具悉朕嗣承艱難之業憂勤十年肆成恢復之圖亦
惟二三將臣宣勞之久以克有濟是用寵卿儀物峻陟
三台蓋非特以示報功抑亦賴卿遠猷以永臻於綏靖

也詩不云乎無德不報朕方勉焉宜趣奉承無煩訓告
所辭宜不允

第三辭免同前不允詔

勅具悉朕惟文武異宜弛張迭用招攜懷遠雖資文德
之修折衝消萌亦賴武功之助古今未嘗以偏廢名器
豈徒於假人卿勲烈著於旂常威名震於夷夏每懷忠
憤之志欲圖恢復之功軍聲既張國勢益振致鄰邦之
講好歸故地以効誠憑力師干庸固多矣疏榮賞典事

豈偶然辭之不足為廉受之無傷於惠往其祇若勿復重陳所辭宜不允

第四辭免同前不允詔

勅具悉卿位居上將績紀太常卻穀守學而彌敦祭遵克已而愈約甘苦同於士卒故雖萬衆而猶一心號令行於師徒故雖千里而如在目久展幹方之略備宣衛社之忠濟此艱難助予興復高秩厚禮允答於元功華袞命圭肆同於三事而乃過形遜德存飾謙詞顧丕號

之已颺豈渙恩之可反毋煩再四以拂予懷所辭宜不
允仍不許再有陳請

乞同齊安郡王士儂等祇謁陵寢因以往觀敵
釁詔以將間不可久虛不須親往詔

勅具悉朕以伊瀍頃隔於照臨陵寢久稽於汎掃逮茲
恢復之日亟修謁款之儀卿慨然陳情請為朕往雖王事
固先於盡瘁然將間不可以久虛殆難輟於撫綏徒有
懷於忠蓋寤寐于是嘉歎不忘已降指揮止差將官一兩

員部押壕寨人匠軍馬共一千人隨士儂張燾前去卿
不須親往故茲詔示想宜知悉

先以湖北京西路累經殘破州縣官無人願就
許令自知通以下辟差今來已復河南故地其
兩路並是腹心所有州縣差官乞自朝廷差注
得旨依奏仍賜獎諭詔

勅具悉昔蘇建常責大將軍衛青至尊重不能招選賢
士青謝曰人臣奉法遵職而已何與招士其言雖未合

理然其處功名遠權勢要當如是爾昨者干戈未戢道路不通襄漢之間凋弊尤甚故州縣之吏上自守宰下至寮屬權時之宜委卿辟置今既臻綏靖遠邇如一銓擇之柄當在朝廷卿所抗章殊合事體自非思慮之審謙恭之至何以及此古人不遠嘉歎靡忘所請宜允故茲獎諭想宜知悉

乞罷軍政退休就醫不允詔

勅具悉卿竭忠誠而衛社迪果毅以臨戎元勲既著於

鼎彝餘暇尚閑於俎豆蕃宣所賴體力方剛遽欲言歸殊非所望顧安危注意朕豈武備之可忘惟終始一心汝亦戎功之是念益敦此義勿復有云所請宜不允

紹興十年

先於荆襄湖北措畫屯田軍食省饋過半賜以御書諸葛亮曹操羊祜三事復賜此詔

勅朕考觀古昔斟酌時宜欲豐軍食之儲必講屯田之制故充國經畫於金城而兼得十二便之利曹操規始

於許下而遂收百萬斛之饒先積粟以為資乃厲兵而
必戰況今寇戎未靖征戍方興賴將帥之同寅致士卒
之樂附顧尺籍所隸之數日以增多而經賦所入之常
歲有定限既不可剥下以取給固莫若興田而雜耕卿
等叶志定謀悉忠體國率勵衆士和協一心勿憚朝夕
之勞共建久長之策故茲詔示想宜知悉

金人背盟烏珠再入河南令諸路進討詔

勅昨者金國許歸河南諸路及還梓宮母兄朕念為人子

弟當申孝弟之義為民父母當興拯救之思是以不憚
屈已連遣信使禮意備厚雖未盡復故疆已許每歲銀
絹五十萬所遣信使有被拘留有遭拒却皆忍耻不問
相繼再遣不謂設為詭計方接使人便復興兵今河南
百姓休息未久又遭侵擾朕盡然痛傷何以為懷仰諸
路大帥各竭忠力以圖國家大計以慰遐邇不忘本朝
之心以副朕委任之意故茲詔示想宜知悉

復蔡州因奏金人之計大合上意獎諭詔

勅具悉比以金勢憑陵我師克捷懼或扭于屢勝致偶忽於不虞乃申飭於戎臣俾各嚴於武備過為待敵之計用收全勝之功今覽奏陳大契朕意有以見卿料事精審為國深謀披採以還良多嘉歎故茲獎諭想宜知悉

辭免少保兼河南府路陝西河東北路招討使
加食邑七百戶食實封三百戶不允詔

勅具悉朕以恢復大計望于爾二三大帥肆於授任之際並渙恩徽所以示注意之渥而卿抗章陳諫力欲懇

辭既嘗申諭至懷乃復固守謙抑雖嘉爾志良非朕心
勉立殊勲是為異報所辭宜不允

再辭免同前不允詔

勅具悉卿每拜官必力懇避誠知卿懷冲遜之實非但
為禮文之虛也今復以將士方冒矢石當鋒鏑而不欲獨
先被厚賞為言陳誼甚高朕所嘉歎第惟同時並拜二
三大帥皆以次受命卿欲終辭異乎遽伯玉用心矣尚
體茲義勿復有云所辭宜不允

郢城戰殺金將鄂爾多貝勒大獲勝捷賜詔獎
諭仍降關子錢犒賞戰士

勅自金人入寇今十五年我師臨陣何啻百萬曾未聞
遠以孤軍當茲巨敵抗縱橫並集之衆於平原曠野之
中如今日之用命者也蓋卿忠義貫於神明威惠孚於
士卒暨爾在行之旅咸懷盡敵之心陷陣摧堅計不反
顧鏖鬪屢合醜類敗犇念茲鋒鏑之交重有傷夷之苦
俾爾至此時予之幸惟敵勢之已窮而吾軍之方振尚

効功名之志亟聞殄滅之期載想忠勤彌深嘉歎降闕
子錢二十萬貫犒賞戰士故茲獎諭想宜知悉

潁昌捷後俄詔班師上章力請解兵柄致仕不
允詔

勅具悉卿勇略冠時威名服衆分鎮一道使敵人無侵
侮之虞盡節本朝致將士有忠誠之効方資長筭助予
遠圖未有息戈之期而有告老之請雖卿所志固嘗在
於山林而臣事君可遽忘於王室所請宜不允

紹興十一年

師至定遠烏珠等渡淮北歸解圍廬州賜獎諭

詔

勅維彼敵人輕犯淮右賴爾將士忠憤一心執銳爭先
刻期並進誓敵王愾用殲世讎既逆遏其鋒鋌遂屢摧
其徒黨捷書累至軍聲大張蓋自兵興以來未有今日
之盛也況淮東之軍且出其後沔鄂之衆復來自南合
吾仁義之師當彼殘暴之寇天時人事理若相符靖亂

息民其在茲舉尚思困獸之鬪務保全功罔俾隻輪之
還庶殄遺育念爾履鋒之苦軫予當饋之歎爰錫璽書
往昭至意其增激於義槩以並茂於功多受讖策勲具
有盟誓高爵重祿朕不汝忘故茲詔示想宜知悉

辭免樞密副使不允詔

勅具悉朕以禍亂未平中原未復更定大計登用樞臣
惟吾制閫之良宜有籌帷之略俾參密席庶協廟謨當
思注意之隆遂展濟時之志守謙避寵非予望焉所辭

宜不允

再辭免同前不允詔

勅具悉朕焦心勞思宵衣旰食所願訓武厲兵一洒讎恥寤寐賢佐協濟良圖卿忠勇自奮材智有餘是宜左右贊襄以輔不逮蔽自朕意擢貳樞廷尚體異知勉攄素蘊毋稽成命固執謙辭所辭宜不允

辭序位在參知政事之上不允詔

勅具悉卿蚤建殊勲顯登亞保雖贊西樞之務實聯左

棘之班肆同列之有陳請會朝而居下朕嘉其自抑蓋有能遜之風俾爾在前且昭右武之意情文俱得禮法無嫌胡為守謙未安厥服勉體睠意勿復有言所請宜不允

帶樞密本職前去按閱御前軍馬措置戰守詔勅保大定功武有經邦之略蚤正素治戒惟先事之防將挾溢以求全必因時而適變連百萬虎貔之旅自我翁張擇一二股肱之良為予聿奏卿勲在社稷名震華

戎謙退踵征西之風廉約蹈祭遵之節比從人望入贊
樞庭方國步之多艱念寇讎之尚肆未反采薇之戍將
親細柳之軍諒匪忠賢孰膺寄委當令行陣之習有素
戰守之策無遺發彼秘謀成茲善計尚體眷注無憚勤
勞故茲詔示想宜知悉

乞罷樞密副使仍別選異能同張浚措置戰守
不允詔

勅具悉朕以前日兵力分不足以禦敵故命令而為一

悉聽於卿朕以二三大帥各當一隅不足以展其才故命登于樞機之府以極吾委任之意凡為此者而豈徒哉戰守之事固將付之卿也今卿授任甫及旬浹乃求去位行府之命措置之責乃辭不能舉措如此朕所未喻夫有其時有其位有其權而謂不可以有為人固弗之信也毋煩費辭稽我成命所請宜不允

辭免男除帶御器械宜允詔

勅具悉朕睠若勲臣任以本兵之寄寵其嗣子俾居扈

從之聯蓋昭信倚之誠豈拘文法之末而卿秉心廉慎
執德謙冲力抗封章固求遜避援三尺而有請諒一意
之莫回勉徇雅懷不忘嘉歎所請宜允

再乞檢會前陳還印樞庭投身散地不允詔

勅具悉朕登用元勲圖回密務方賴同心之助式恢馭
遠之規曾居位之日幾何乃丐閒之章踵至無亦過矣
為之憮然其體注懷尚安厥位所請宜不允

辭免武勝定國節度使依前少保充萬壽觀使

仍奉朝請乞一在外宮觀差遣不允詔

勅具悉卿登翊樞筦曾未淹時乃以人言遽求釋位惟去就之義卿之所敦顧終始之恩朕安敢廢茲用寵以節旄之舊畀之祠祿之優君臣之間庶幾無愧令弗惟反又何辭焉所請宜不允

金佗續編卷四

欽定四庫全書

金佗續編卷五

宋 岳珂 撰

絲綸傳信錄卷四

紹興元年

除神武右副軍統制省劄

樞密院奏勘會神武右副軍統制顏孝恭見管軍馬不多兼已撥付呂頤浩軍前使喚

右三省樞密院同奉聖旨顏孝恭改差充江南東路
安撫大使司統制軍馬岳飛罷通泰州鎮撫使差充
神武右副軍統制今劄付神武右副軍統制武功大
夫岳防禦准此

乞科撥錢糧照會從中省劄

武功大夫昌州防禦使充神武右副軍統制岳飛申契
勘飛於紹興元年八月十三日准樞密院劄子備奉聖
旨指揮令飛一行官兵權留洪州駐劄彈壓盜賊續奉

聖旨指揮般取本軍昨存留徽州官兵老小前來洪州
一處屯泊合用錢糧令江西轉運司應副尋不住移牒
本司據本軍合用錢糧恭依已降聖旨指揮應副施行
去後並不見措置科撥催發到來況本軍方到洪州駐
劄一月餘日累承本州公文止稱闕乏應辦不足其合
勘請十月初五日至初九日錢米除已支請外少錢五
千四百九十六貫七百五十文米七百四十一石三斗
一升五合支遣不足所有初九日已後錢米亦無指準

念飛所部軍兵唯仰官給錢糧養贍過日方免失所似此洪州並不掛意着緊措畫移那應副及江西轉運司又不見預行寬剩計置取撥赴洪州相續支用致得闕悞不唯軍兵目今已見闕食兼日後又無指准批請自今年九月二十三日後來不住申明朝廷乞賜行下本路轉運司疾早措置支移合用錢糧起發前來洪州應副支遣去訖至今未蒙回降指揮除已具錄奏聞伏望聖慈特降睿旨下江西轉運司將本軍合用錢糧着緊

催發相繼津般前來以濟急闕支用及令洪州更切多方計置移那應副施行庶免冬月官兵闕食失所外伏候指揮

勘會岳飛前申已累劄下江南西路轉運司詳所申事理疾速那容應副不得少有闕悞并劄下江南西路安撫大使李資政照會催促應副施行已再劄下江南西路轉運司依已劄下事疾速那容應副不得依前少有違悞外今劄付建州觀察使神武右副軍

統制親衛岳大夫照會

紹興二年

權知潭州并權荆湖東路安撫都總管省劄

紹興二年正月二十九日樞密院闕奉聖旨令岳飛除差出捉殺石陂羣賊軍兵叁千人外限指揮到日下將帶見統全軍兵馬起發前去權知潭州并權荆湖東路安撫都總管候宣撫司到日取朝廷指揮如更合要兵馬卽勾收張中彥吳玠兩軍帶領前去聽岳飛節制使

喚其合用錢糧令韓球專一應副起發仍劄下江南西路安撫大使司照會內有合屬尚書省事今關送尚書省指揮

右劄付親衛大夫神武右副軍統制建州岳觀察依樞密院關子內已得聖旨指揮疾速施行准此

紹興三年

改充江南西路制置使

三省樞密院同奉聖旨岳飛落泂江貳字充江南西路

制置使江州駐劄其沿江興國南康軍一帶江面仰多方措置防托隄備及本路州軍緩急遇有賊馬侵犯去處亦仰隨宜分撥軍馬前去應援無致疎虞餘並依已降指揮

右劄送神武副軍都統制充江南西路制置使岳承宣疾速施行准此

除江南西路舒蘄州制置使省劄

三省樞密院同奉聖旨岳飛除江南西路舒蘄州制置

使江州置司

右除別降勅命外今劄送神武副軍都統制新除江南西路舒蘄州制置使岳承宣照會准此

收捕虔吉州盜賊王貴以下推恩省劄

岳飛奏收捕虔吉州盜賊逐人屢次見陣率衆當先掩殺賊徒各立奇功乞推恩今具下項武顯大夫閣門宣贊舍人統領官王貴欲王貴與轉參官內壺官除遙郡刺史壺官依條回授武功郎閣門宣贊舍人統領官張

憲欲張憲與轉參官內壹官除遙郡刺史毅武郎統領
官徐慶欲徐慶與轉參官內壹官除閣門宣贊舍人九
月二十九日三省樞密院同奉聖旨依擬定內王貴張
憲落閣門宣贊舍人

右劄送神武副軍都統制江南西路舒蘄州制置使
鎮南軍岳承宣

改差充神武後軍統制省劄

奉聖旨岳飛特改差充神武後軍統制還闕依前江南

西路舒蘄州制置使其見統官兵並改撥充神武後軍
右除別降告命外今劄送新差神武後軍統制江南
西路舒蘄州制置使岳承宣疾速施行准此

紹興四年

朝省行下事件省劄

三省樞密院同奉聖旨依下項

一王瓊見駐軍鼎州招捕楊么累有申奏乞別差
官兵防托大江今差岳飛兼制置荆南鄂岳其湖

北帥司統制官顏孝恭崔邦弼兩軍并荆南鎮撫使司軍馬並聽節制使喚

一李橫退師據諸處探報叛人李成孔彥舟等占據襄陽府唐鄧隨郢州信陽軍候麥熟聚兵南來作過岳飛累有奏陳措置收復備見盡忠體國今差本官統率所部軍馬於麥熟以前措置收復上件州軍

一今來出兵止為自通使議和後來朝廷約束諸

路並不得出兵偽齊乘隙侵犯李成等輒敢占據
須着遣兵收襄陽府唐鄧隨郢州信陽軍六郡地
土即不得輒出上件州軍界分所至州縣務在宣
布德意存恤百姓如賊兵抗拒王師自合攻討若
逃遁出界不須遠追應官吏軍民來歸附者不得
殺戮一面招收存恤亦不得張皇事勢誇大過當
或稱提兵北伐或言收復汴京之類却致引惹務
要收復前件州軍實利仍使偽齊無以藉口

一岳飛本軍每月見支錢一十二萬餘貫米一萬四千餘石會計出師三月軍須合用錢三十六萬餘貫米四萬二千餘石今來慮有添兵及有搞設激賞理宜寬剩支降今於行在權貨務支銀一十萬兩每兩二貫五百文金五千兩每兩三十貫文二項計准錢四十萬貫吉州權貨務於今年貼納筭請等鹽錢內支二十萬貫已上總計支錢六十萬貫內以二十萬貫充搞設激賞米支六萬石於

沈昭遠催運二十萬石內先次發到江上米內支撥並令岳飛措置隨軍支遣如人船不足令帥司運司極力應副

一收復諸州並委岳飛隨宜措置差官防守如城壁不堪守禦相度移治山寨或用土豪或差舊將牛皋等主管事畢大軍復回江上屯駐

右劄送江南西路舒蘄州兼荊南鄂岳州制置使岳承宣疾速施行不得下司

劉洪道奏李成結連楊么省劄

荆湖北路安撫使劉洪道奏臣於三月初八日據權知岳州劉愿申收到楊么寨內走出王璦軍統制官吳全下元被捉使臣王忠等取責到知見偽齊李成結連楊么等欲南來作過等事臣契勘近據探報李成於襄鄧等州添兵聚糧置造船械攻城器具欲南來作過緣本路闕兵隄備臣已具利害奏乞添屯重兵防禦去訖今又據前項權知岳州劉愿申報外寇與湖賊結連欲水

陸侵犯與其他風傳探報不同兼目今江湖水勢已漲上流防禦繫朝廷大計伏望詳酌臣已奏并今奏事理速降睿旨施行伏候勅旨

右奉聖旨劄與岳飛今劄送神武後軍統制江南西路舒蘄州制置使岳承宣准此

照會偽齊已差人占據州郡省劄

樞密院奏權發遣復州軍州事韓通等申州司近差人探得襄陽府見係偽齊差李成據占郢州係偽齊差荆

全據占隨州係偽齊差王嵩據占鄧州係偽齊差一姓
高人據占逐處人多不過千人少止有五六百人馬多
不過一二百疋少止有五六十疋糧食逐旋令人去唐
州界何劉家寨般取其處號為新唐州逐州見今團集
鄉兵各置鋪寨及不住添修樓櫓置造器具兼逐州各
有李橫等種下大小二麥不少切慮將來二麥成熟修
葺成就難以收復州司除已具狀奏聞乞速賜施行外
申聞事

右奉聖旨劄與岳飛今劄送江南西路舒蘄州制置使岳承宣照會施行准此

再據劉愿申楊么賊徒結連作過省劄

權知岳州劉愿申契勘荆湖制置使王四廂復提大軍前去鼎州措置招捕楊么賊徒二月二十四日到州收到被擄軍兵王忠等二名自賊寨脫身出來尋行取問責據逐人供各是水軍統制吳全部下人內王忠是使臣袁海是効用去年十一月十一日隨吳全乘海船入

湖討捕楊賊到地名青江上口逢賊大車船本軍船小
當被圍了勢力不加遭賊擒殺吳全一行兵將王忠等
各被捉縛回寨得賊首楊么黃誠存留在寨使喚王忠
等日逐見楊么黃誠等評議下項機密事件除已將王
忠等解赴制置王四廂軍前外契勘本州係據長江上
流西臨重湖北通襄漢襟帶荆鄂屏蔽湖南自古號扼
控重地今又係楊么賊船出入要途若本州可以捍禦
必不能侵犯下江州郡昨累經金人巨寇蹂踐民戶所

存百分之一州城燒毀殆盡商賈不通稅賦無入在州
只有些小彫殘貧民四圍並無城壁錢糧儲積無分文
顆粒捍賊軍馬無一卒一騎從來每遇盜賊水陸侵犯
官吏已下必全城逃避謂州郡守臣帶沿江安撫特有
虛名今據王忠等供說楊么賊徒已與偽齊李成結連
先取本州安存老小以為硬寨然後順流而下侵犯江
浙幸而預知豈可坐待若不預為措畫萬一賊至不惟
失一岳州荆湖南北便見隔絕占據上流下江所繫甚

重欲望朝廷矜恤本州並無城壁錢糧軍兵外賊內寇結連指日首先攻取占據要作硬寨然後侵犯江浙委是事勢迫切特賜選差前項精銳軍馬支撥錢糧下本州駐劄仍乞悉聽本州節制庶可為用愿已於二月二十四日具此因依專差成忠郎烏沙鎮監酒稅權本州司戶叅軍李佐齋申尚書省愿切慮前狀在路住滯未到又於當月二十五日再具狀申去訖今來春水泛漲楊么賊船不住出沒作過事勢委是危急伏乞詳酌速

賜指揮施行候指揮

一去年十二月三日見偽齊下李成發使臣稱是
康武翼來下文字要與賊商議通和令賊首楊么
黃誠壽等打造大車船準備來年七月間前來鄂
州漢陽蘄黃州已來迎接李成相公一行人馬已
備下甲軍二十萬就你門大船濟渡許留甲軍三
萬與楊么黃壽等相添裝壓車船令賊船取水路
下江李成取陸路經由江西前來兩浙會合要赴

行在作過候了日許楊么等荊湖兩路與鍾相男
偽太子建國通和當時楊么黃壽等允許供應
公文交付康武翼於當月七日發遣回去

一見賊首誣議張宣撫相公招安事其楊么黃壽
等所說目即且權許受招安圖教諸小寨兵夫放
心作田兼要諸處採木人船穩便及要疑住諸路
人馬不動本寨安然打船

一諸賊寨已有大小車船共二十九隻及創行打

造大車船一十五隻每隻各長一百步底闊三丈高三丈五尺板厚七寸各要四月半先造成底推入水候五月盡船就令人兵六月間火急收刈早稻七月間起發先取岳州作老小硬寨將舊車船排泊城下要抵攔潭鼎州人馬却將新車船一十五隻前去攻取鄂州漢陽蘄黃州已來迎接李成軍馬到來濟渡分水陸路前去浙中會合

一賊寨逐時行移文字只作甲寅年並不用紹興

年號今年七月間定是會合偽齊攻打松江州縣
右勘會近據劉洪道申到前項事理已奉聖旨劄與
岳飛去訖今再劄送江南西路舒蘄州制置使岳承
宣准此

金匱續編卷五